

**ARTIKEL “BALI ORTI”  
HARIAN BALI POST DENPASAR**

Dipublikasikan Minggu, 30 Des 2012

---

**TUNTUNAN KARAKTER WANGSA  
RING WIRACARITA “BHAGAWAN DOMYA”**

**Antuk  
Dr. I Nyoman Suwija, M.Hum.**

**1. Purwaka**

Tuntunan karakter wangsa sampun karasayang merupa isu sané dahat mautama ring aab jagaté mangkin. Indiké puniki macihna ring kasusrusan pikayunan Kemendikbud RI sané duk warsa 2011 nyantenang tema panyangran Hardiknas, inggih punika “*Pendidikan Karakter adalah Pilar Kebangkitan Bangsa*” maweweh subtema “*Raih Prestasi Junjung Tinggi Budi Pekerti*”.

Maiketan ring puniki, Presiden Soesilo Bambang Yudhoyono ngaptiang parajana Indonesiané midabdabin tema miwah subtema punika antuk ucapan “*Kita ingin bangsa Indonesia memiliki generasi yang unggul pada peringatan satu abad proklamasi kemerdekaan Indonesia. Generasi unggul adalah generasi yang memiliki karakter yang memenuhi kualifikasi unggul*” (Suwija, 2012:68).

Masaih ring pikayunan bapak presiden, Bapak Mohammad Nuh (Mendikbud RI) (2011: 8-9) nyantenang mungguing kabangkitan wangsa nénten dados pasahang saking sektor pendidikan. Karakter suang-suang jadmané akéhan kawangun malarapan proses pendidikan. Duaning asapunika, kanggén ngwangun karakter unggul sané pradnyan (*terdidik*) lan sumakuta (*bertanggung jawab*), banget kaperihang pendidikan sané becik madué kualitas inggil.

Mohammad Nuh susrusa pisan nyobyahang tatacara lan pidabdab pendidikan ngwangun karakter wangsa. Kabaosang mungguing kultur sekolah patut kautamayang pawangannyané duaning sané mawasta karakter (*kepribadian*) punika nénten ja sida kawangun ring kelas, sakéwanten kausin antuk saluir tata interaksi. Wantah karakter inggil sané pacang prasida mawinan wangsané pacang bangkit masikian. Taler kabaosang, pendidikan druéné patut prasida mawali, ngwangun karakter asli (*orisinil*) pinaka wangsa *pejuang, tangguh, cerdas, cinta tanah air, santun, dan penuh kasih sayang*.

Pendidikan karakter tatan péndah kadi toyané membah, prasida kamolihang ring saluir ranah kahuripan. Duaning asapunika, Muhammad Nuh mapikayun, suang-suang guru,

inggian guru rupaka (*orang tua*), guru pangajian (*guru ring lembaga pendidikan formal*), miwah guru wisesa (*pemerintah*) madué galah becik kanggén nyusupang tuntunan karakter ring para yowana wangsané. Duaning asapunika, aplikasi pendidikan karakter nénten merihang program khusus. Ring lembaga pendidikan formal, pendidikan karakter prasida kasusupang antuk suang-suang guru ring widang paplajahan sané kaemban.

Ring paplajahan basa Bali, pendidikan karakter katah pisan prasida kanggit ring pangajah-ajah widang susastra, inggihan ring susastra Bali purwa (*tradisi*) miwah ring susastra Bali anyar (*modern*). Ring sasuratan puniki pacang kawedar silih sinunggil cerita sané karasayang madaging tuntunan karakter, inggih punika crita “Bhagawan Domya”.

## **2. Karakter Guru Domya**

Kaceritayang Ida Bhagawan Domya madué sisia tigang diri: Sang Arunika, Sang Utamaniu, miwah Sang Wéda. Pinaka dang guru jati, Bhagawan Domya sampun ngamargiang swagina manut katatwaning karakter guru. Yéning selehin manut cerita, Ida Bhagawan Domya madué karakter (*cinta ilmu, kemandirian, berkeadilan, cinta kasih*).

Karakter *cinta ilmu* (oneng ring kaweruhan) prasida karasayang sajeroning swagina sané kalaksanayang inggih punika setata mapaica pangajah-ajah ring para sisiané mangda manados sisia utama sané wikan, waged, wagmi, miwah wicaksana. Ida ngajahin makatiga sisiané mangda setata jemet malajahang angga. Sasampun duur nénten pisan kadadosang ngedih wantuan ring anak tiosan. Puniki pinaka cihna nedunang karakter *kemandirian*.

Indik karakter *berkeadilan* sané makanten ring Ida Bgahawan Domya, mantuk ring makatiga sisiané, ida nénten pisan mabina-binayan. Sang Arunika, Sang Abimaniu, miwah Sang Wéda kapticain kaweruhan sané pateh, saha makasami kapintonin antuk swagina sané abot-abot. Raris, indik karakter cinta kasih kasinahang ri kala para sisianidané mangguhini wicara utawi kaduhkitan.

Ri kalaning Sang Arunika katibén blabar ageng sané mawinan telas tetanduran pantuné keni blabar, Sang Arunika ngentunang angga ring tukadé. Irika kawelasihan Ida Bhagawan Domyané ring sisia, saha mapica panugrahan ring Sang Arunika. Asapunika taler ri kala Sang Utamaniu runtuh ring jurangé sasampun ida nénten nyingakin sangkaning panyingakanipadé buta kena getah madori, taler rauh kawelasan Ida Bhagawan Domya, nulungin Sang Utamaniu kantos waras kadimula, saha kaicenin waranugraha sidimantra sandingucap.

### 3. Karakter Sisia

Indik karakter sané kasinahang antuk para sisia, inggian (Sang Arunika, Sang Utamaniu, miwah Sang Wéda), wénten patpat, minakadi karakter: (1) bhakti ring guru (*keimanan*), (2) teleb malajahang angga (*giat belajar*), (3) prawira/kapurusan (*pantang menyerah*), miwah (4) sumakuta (*tanggung jawab*).

Malarapan pangajah-ajah sané kapaica olih Bhagawan Domya ring para sisia, sampun mapuara becik. Sang Arunika, Sang Utamaniu, miwah Sang Wéda nganutin ajahan silakramaning manados sisia, nénten pisan purun tempal ring sapituduh guru. Baktin para sisia ring guru nénten dados rered duaning sangkaning guru mawinan sisia uning ring kaweruhan, madué kawagedan sané dados kanggén bekel ngruruh pangupajiwa. Puniki banget pisan katelebang olih Sang Arunika, Sang Utamaniu, miwah Sang Wéda pinaka sisia.

Sangkaning bhakti ring guru, sangkaning piteket-piteket saking guruné para sisia madué karakter teleb malajahang angga (*cinta ilmu*), banget mapangapti mangda dados anak wikan. Sapisira ja sampun prasida numbuhang rasa mungguing pangweruhan punika agung kawigunipun, majanten pacang susrusa malajahang angga, nincapang karakter *cinta ilmu*, setata badak ngamolihang kaweruhan, kapradnyanan, miwah kawagedan.

Malarapan subakti ring guru, tinut ring sapituduh guru, ri kala kapaica swagina, minakadi Sang Arunika kanikain nandur pantun saha nénten dados ngedih wantuan ring anaké tiosan, sampun sida kalaksanayang. Taler Sang Utamaniu, jemet tur langgeng makérti ngangon lembu, ngiringang pituduh guru Domya. Saluir wicara utawi pakéwuh sané kapanggih, sampun kalaksanayang manut pituduh guru. Taler Sang Wéda maraga lanang kanikain makarya ring pawaregan ngambil pakaryan anak istri, nénten pisan ida nulakang. Makasami kamargiang antuk daging manah subakti. Puniki pinaka ciri para sisia sampun ngamanggehang karakter kapurusan (*pantang menyerah*).

Karakter kapurusan (*pantang menyerah*), nénten makelid angan akidik ring swagina sané kapicayang saha madasar daging manah hening, bhakti ring guru, mapuara metu karakter sumakuta (*penuh rasa tanggung jawab*). Sapuir titah sané kanikain antuk sang maraga guru, makasami kalaksanayang antuk sumakuta (*tanggung jawab*). Para sisia jagi marasa pocol yéning nénten prasida nglaksanayang titah sang maraga guru antuk antar tur labdakarya. Punika mawinan pamuputnyané kaceritayang makasami ngamolihang panugrahan urip sukerta, sidimantra lan sandingucap.